

15. november 2018

Inatsisartut suleriaasianni §37 imm. 1 naapertorlugu Naalakkersuisunut apeqqut imaattoq matumuuna saqqummiuppara:

Naalakkersuisunut apeqqut:

- 1. Peqqinnissamut Naalakkersuisoq aperissavara immikkut suliniutit suut aallartisarniarneqarpat?**
- 2. Sinerissami qaammatit tamaasa kinguaassiuutitigut nappaatit nalunaarusiarineqartalissappat?**
- 3. Veneriami sulisut amerlisarneqassappat?**

(Inatsisartunut Ilaasorta, Doris J. Jensen)

Tunngavilersuut:

Nunarput HIV-ip tuniluunneranik eqqugaaqqippoq. Inuit tallimat 20-t 40-llu akornanni ukiullit HIV-mik tunillatsissimasut tusagassiuutitigut saqqummiunneqarpoq tuniluuttullu siaruaannerunissaa annertuumik ernumalersitsisoq, Nunatsinni nakorsaaneq Henrik Hansen oqariartuuteqarpoq.

Nunatsinni nakorsaanerup oqaatigaa, assut ernumanartoq inuusuttut HIV-mik aammalu syfilisimik tunillatsissimasut amerlialuttuinnarmata tamannalu nunatta inuttussusianut naleqqiullugu amerlapput inuusuttullu pineqarmata immikkut ernumanaatilittut nunatta nakorsaanerata aamma erseqqissaatigaa.

Ukiuni kingullerni nunatsinni Klamydiamik tunillatsissimasut 3000 sinneqartarput, gonorremik tunillatsissimasut 1000 sinnerlugit massakkullu kinguaassiuutitigut nappaatit suli ulorianarnerusut tuniluunnerat syfilis HIV-lu suli qaffakkiartorput inuusussiartorlutillu.

Nakorsaanerup nassuiaanera malillugu misilittakkat takutippaat inuusuttut taama ukiullit utoqqaanerusunut sanilliullugit arlalinnik atoqateqartartut, taamaattumillu sukkanerusumik tuniluunnissaa assut aarlerinaateqartoq.

Kinguaassiuutitigut nappaatit pillugit paasisitsiniaasarneq ingerlaavaraluartoq aammalu nunatsinni usuup puunik akeqanngitsunik pinissamut periarfissat pitsaasuungaluartut kinguaassiuutitigut nappaatit naartuersittartullu ikiliartunngillat. Tamanna tunngavigalugu nappaatit atoqatigiinnikkut tuniluuttartut ajornartorsiutaanerata pimoorulluinnartariaqartoq nakorsaanerup ersarissarpaa, tamanna inunnut ataasiakkaanut inuiaqatigiinnullumi annertuupilussuarmik kingunerlutsitsisisarmat.

Ukiorpassuarni misilittakkat takutippaat, usuup puuisa akeqanngitsumik pissarsiassaanerata paasisitsiniaanerillu ataavartut ulloq manna tikillugu pitsaanerusumik sunniuteqanngitsut. Sukkasuumik iliuuseqartariaqarpugut immaqalu allatut eqqarsartariaqalerluta, usuup puui imerniartarfinnut, taxanut, ilinniarfinnut, kollegianut hotelinullu siammarterlugit, sinerissami

veneriat amerlillugit inuillu veneriami sulisinnaanermut ilinniarsimasut amerlisarlugit. Ajornartorsiut taama annertutigisoq isiginngitsuusaarsinnaanngilarput immikkullu iliuseqarfigisariaqarparput piaarnerpaamik. Akuerineqarsinnaanngilaq nunatsinni Qeqqata Kommunia kisiartaalluni toqqannartumik veneriaqarnera, taakkua nunatsinni kisiartaallutik qaammatit tamaasa kinguaassiuutitigut nappaatit tuniluuttut pillugit statistikkiliortarput, veneriamut nakorsiartunut aaversitsinniartunullu ullut tamaasa ammatitsisarput oqaloqatiginnittarlutillu. Taamaammat sineriammi veneriami sullissineq sipaarniarfiginagu piaartumik tigussaasunik sukumiisumillu annertusaaffigineqartariaqarpoq pitsanngorsartariaqarlunilu taamaaliunngikkutta nunatsinni taama ikitsigaluta ajunaarnersuartut ittumik nappaatit amerliartuinnassapput.

Apeqquteqaatimma ullut suliffiusut qulit iluanni akineqareersimanissaat kissaatigaara.